

Conseho Electoral Aruba a duna un ultimo actualisacion tocante firma di sosten pa partidonan

Ayera Conseho Electoral Aruba riba su rednan social a duna un actualisacion riba e firma di sosten pa partidonan cu si ta bay participa den eleccion dia 6 di december, y tambe di esun cu no a logra yega na e cantidad di firma rekeri.

Manera ta conoci, cada lista di candidato di un partido politico cu no a haya asiento den Parlamento na e ultimo eleccion mester haya sosten cu 1% di e suma di e cifranan di voto di e eleccionnan anterior, segun articulo 17 inciso 1 conhuntamente cu inciso 4 KV ta indica.

E suma di e cifranan di voto ta nifica e cantidad di votonan valido emiti den ultimo eleccion. Pa eleccion di 2024, e cantidad aki tabata consisti di

586 firma.

Ta duna e sosten aki door di pone un firma di votadonan sosteniendo e lista di candidatonan cu a ser entrega, durante 7 dia di trabao consecutivo for di 9:00 am pa 8:30 pm (Articulo 17, inciso 2, KV).


Esaki ta ser haci door di pone un firma riba un formulario cu ta poni disponibel pa esaki, indicando en todo caso e lista di candidatonan cu ta sostene, como tambe e fam, nomber y fecha di nacemento di e votadonan menciona den articulo 33, di dos paragraf.

Partidonan manera PPA y Futuro a logra colecta nan firma e prome dia; siguiientemente partidonan CURPA, Lucha pa Reforma, RED Democrat-

ico y Hubentud Treciendo Cambio (HTC).

Esnan cu no a logra haya sosten di firma pa eleccion aki ta partido Union y Prosperidad pa Pueblo (UPP), unda Giovanni Trim ta e lider cu 89 firma so. Durante entrega di lista, Trim a sigura cu Aruba tin hopi problema, “kiermen ora cu nos lo drenta den gobierno, nos tin cu hinca man den tur cos pa drecha tur cos, pa saca Aruba for di bomboshi y claro un di e prome cosnan cu nos ta bay traha riba dje duro ta pa baha costo di bida y tambe nos tin nos studiantenan cu no kier ni regresa Aruba.”

Pa loke ta trata e partido Movimento Indigena Arubano (MIA) di Helena Croes cu a haya 55 firma, tambe el a duna un declaracion pa me-



dionan local dia di entrega di lista, den cual el a splica cu su partido ta para pa “proteccion di nos teritorio, proteccion di nos identidat y auto determinacion di e pueblo indigena di Aruba.” Esaki ta pa motibo cu nan no

ta di acuerdo pa sigui construi mas hotel na Aruba. “Nos no kier mas permiso, nos no kier pa nan sigui kibra nos tera tampoco, tampoco nos kier pa ni un stranhero cumpira real estate na Aruba,” Croes a declara.

Persona deteni diamars no ta e chauffeur responsabel pa ocasiona accidente fatal diadomingo marduga

Diadomingo den oranan di marduga, un persona a ser alcanza door un auto causando un accidente basta fuerte cual a resulta den morto di un persona femenino di 35 aña di edad. E chauffeur responsabel a bandona e sitio. Despues di encontra un auto completamente kima na Wela, Cuerpo Policial a informa cu a detene un persona relaciona cu e accidente fatal aki.



Diamars den oranan di merdia, varios medio di comunicacion local a informa tocante e detencion di un muhe na Primavera cu posiblemente lo ta relaciona cu e accidente fatal cu a sucede diadomingo anochi, na unda e chauffeur a bandona e sitio.

Despues di reportahe cu a haya un auto marca Honda Fit kima na Wela, autoridadnan a bay na un cas na Primavera pa detene e persona, di inicialnan A.C.C.D. di nacionalidad

Venezolano, di 30 aña di edad, en conexion cu investigacion di e accidente fatal aki.

Segun medionan di comunicacion local a indica despues di algun ora, den oranan di atardi, autoridadnan a laga e persona aki den libertad ya cu a logra comproba cu e no tabata e chauffeur di e auto cu a causa e accidente fatal diadomingo marduga.

Te ainda no tin confirmacion di ken e chauffeur ta, pero algun informacion cu ta circula riba rednan social ta indica cu un persona masculino di inicialnan J.R. por ta e culpabel di e accidente cu a cobra bida di un persona.

Bon Dia Aruba a tuma contacto cu vocero di Cuerpo Policial, Liliana Rasmijn, pa puntra un actualisacion riba e caso y si e informacion cu ta

circulando riba rednan social ta corecto. Bon Dia Aruba no a logra ricibi un contesta prome cu ciere di e edicion.

E caso

Diadomingo den oranan di marduga un persona a ser alcanza door un auto causando un accidente basta fuerte cual a resulta den e morto di e persona di 35 aña edad. E chauffeur cu a ocasiona e accidente fatal aki a bandona e sitio.

Segun un comunicado di Cuerpo Policial a indica, e informacion ta cu diadomingo marduga pa 01:10 Central di Polis a haya notificacion di un accidente na altura di Shiribana Bar & Restaurant na Paradera.

E prome informacion cu a drenta ta cu un auto lo a alcanza un señora riba un e-bike (step). Central a despacha un patruya cu maximo urgencia y na yegada di e patruya ta

bin topa cu un señora ariba caminda cu no tabata duna señal di bida. Patruya ta pidi ambulance cu maximo urgencia y ora persona di ambulance a yega nan a haci nan maximo esfuerzo, pero lamentablemente no por a haci nada mas pa e señora.

Dokter Valkuil ken ta fungi como Dr. forensico a presenta na e sitio y a constata morto di señora Julieth Patricia Patiño Castro naci 15 november 1988 (35 aña) na Colombia. Departamento di trafico a presenta pa haci nan investigacion.

Mirando e situacion grave Alto Comisario di polis, Ramon Arnhem, a pidi e chauffeur cu a causa accidente fatal pa entrega su mes. Mediante un declaracion dialuna ultimo e alto comisario a sigura cu “esaki ta inaceptabel” caminda e chauffeur no a para ni a brinda ayudo na e victima y a bandona e sitio.

Bon Dia Aruba formalmente ta distancia su mes di accion y palabra di Sr. Francisco Figaroa

A bin na atencion di Bon Dia Aruba cu Sr. Francisco Figaroa a representa su mes como un persona afiliado na nos corant. Bon Dia Aruba ta enfatisa cu

Sr. Francisco Figaroa no ta traha pa Bon Dia Aruba, no ta autorisa pa papia ni actua den nomber di Bon Dia Aruba, y no tin ningun autorisacion pa usa

nomber di Bon Dia Aruba.

Mediante esaki, Bon Dia Aruba formalmente ta distancia nos mes di cualkier accion y palabra di Sr. Francisco

Figaroa cu el a haci como un ciudadano priva, sin autorisacion ni conocimiento di Bon Dia Aruba.

E trahadornan di Bon Dia

Aruba cu ta representa nos corant y ta afilia cu e compania ta exclusivamente e nombrenan indica den nos Colofon riba pagina 5.